

2019-imut Ilassutissatut aningaasaliissutininut inatsisissatut siunnersuut
(Aningaasaqarnermut Aatsitassaqaqarnermullu Naalakkersuisoq)

Saqqummiussissut

(Aningaasaqarnermut Aatsitassaqaqarnermullu Naalakkersuisoq)

Siullermeerneqarnera

Matumuuna Naalakkersuisut sinnerlugit 2019-imut Ilassutissatut aningaasaliissutininut inatsisissatut siunnersuut saqqummiutissavara. Inatsisartut Naalakkersuisut pillugit inatsisaanni § 16-imi aalajangersakkani takuneqarsinnaavoq aningaasartuutit Inatsisartunut tunngassutillit Aningaasaqarnermut Akileraartarnermullu Ataatsimiititaliamit akuersissutigineqartut ukiumoortumik ilassutissatut aningaasaliissutissanut inatsimmi ataatsimoortinneqassasut, taakkulu ukiumi aningaasanut inatsiseqarfiusumi tulliuttumi Inatsisartut ileqquusumik ataatsimiinneranni siullermi oqaluuserineqassasut.

2019-imut Ilassutitut aningaasaliissutininut Inatsisissatut siunnersuut taamaalilluni kingumoortumik aningaasaliinertut isigineqassaaq. Ilassutissatut aningaasaliissutissanut inatsimmi aalajangiinerit Naalakkersuisut aningaasanut inatsimmi oqaasertaliussatigut piginnaatitaaffigisai aamma Aningaasaqarnermut Akileraartarnermullu Ataatsimiititaliap Suleriaasiani aningaasanut inatsiseqarfiusumut 2019-imut aalajangiiffigineqareersut iluarsineqareertarput. 2019-imut Ilassutissatut aningaasaliissutininut inatsit ilanngussaq 1-imi ilaqarpoq, tassanilu aningaasaliissutissanut allannguutit 2019-imi akuersissutigineqareersut ilaapput aamma ilanngussaq 2 2019-imi oqaasertaliussanik allannguinerik akuersissutaareersunik takutitsisoq ilaalluni.

2019-imut Aningaasanut inatsit aamma 2019-imut Ilassutissatut aningaasaliissutissanut inatsisissatut siunnersuut ukiumut aningaasanut inatsiseqarfiusumut 2019-imut aningaasaliissutaasunut tamarmiusunut takutitsiffiupput. Taamaalillutillu Nunatta Karsiata 2019-imut Naatsorsuutaanut tunngaviussapput, taakkulu Inatsisartunit ataatsimiinnermi matumani suliarineqartussatut ilimagineqarlutik.

2019-imut Aningaasanut inatsit missingersuutigineqartut IST-mi 12,1 mio. kr.-nik sinneqartoorfiusussatut aamma missingersuutaasut IS-imi 7,2 mio. kr.-nik sinneqartoorfiusussatut takutitsivoq.

Inatsisartut Aningaasaqarnermut Akileraartarnermullu Ataatsimiititaliaata aamma Inatsisartut Suleriaaseq pillugu Ataatsimiititaliaata 2019-imi ilassutitut aningaasaliissutit katillugit tallimaasut, IST-mi inernerit missingersuutaasut katillugit 55,5 mio. kr.-nik ajorseriartitsisut akuersissutigisimavaat.

55,5 mio. kr.-nik ajorseriartoqarneranut ilaatigut sulisunik peqqissaanermik ilisimasalinnik sulisussarsiortarnerup suli ilungersunarnera napparsimasunillu sularinnittarnerit amerliartornerat pissutigalugit ilaatigut peqqinnissaqarfimmut 23 mio. kr.-nik ilassutitut aningaasaliisoqarnissaata akuersissutigineqarsimanera pissutaavoq.

Tamatuma saniatigut 2020-mut aningaasanut inatsit aqqutigalugu Folketingimit akuersissutigineqarsimavoq naalagaaffik katillugit 80 mio. kr.-nik immikkoortitsissasoq ukiumi sisamani Kalaallit Nunaanni sumiginnaasarnernut isumaginninnikkut suliniuteqartoqarnissaanut atugassanik. Tamatuma kingunerisaanik katillugit 20 mio. kr.-t Kalaallit Nunaata suliniummut tapiissutissaatut immikkoortinneqassasut Aningaasaqarnermut Akileraartarnermullu Ataatsimiititaliamit akuersissutigineqarput. Aningaasaliissutaasut pissusiviusut malillugit 2020-mit atorneqarsinnaalissapput, taamaalinerani suliniutigineqartoq naalagaaffik peqatigalugu ataqatigiissarneqalissammat. Aningaasaliissutinik 20 mio. kr.-nik immikkoortitsinerup akuersissutigineqarnera IST-mi inernerit missingersuutaasut 10,2 mio. kr.-nik ajorseriarnerannik kinguneqarpoq, tassami aningaasaliissutaasut affaat angullugit ilaatigut ingerlatsinermut sillimmatini aningaasaliissutaasunit aningaasalersorneqarsimammata.

Ilanngullugu ilassutitut aningaasaliissutit IST-mi inernerit 22 mio. kr.-nik ajorseriarfiussasut naatsorsuutaasut akuersissutigineqarsimapput, tamannalu pisimavoq Kalaallit Nunaanni mittarfiliortiternissami qallunaat peqataanissaat pillugu qallunaat naalakkersuisuisa Naalakkersuisullu akornanni isumaqatigiissutaasumi imaritinneqartut aamma Kalaallit Nunaata Danmarkillu akornanni inuussutissarsiutitigut annerusumik suleqatigiittoqarnissaa tunngavigalugit, tassami aalajangersarneqarmat Kalaallit Nunaanni Namminersorlutik Oqartussat naalagaaffillu Greenland Venturemi aamma Vækstfondenimi katillugit 200 mio. kr.-nik aningaasaliisoqassasoq Kalaallit Nunaanni ataatsimut aningaasaliisoqarnissaa siunertaralugu. Taassuma saniatigut Greenland Venturemi aamma Vækstfondenimi ilaatigut Kalaallit Nunaanni inuussutissarsiutitigut suliniutit ilimanaatillit inerisarnissaannut suliniuteqarnerisa pitsaanerulersinnissaat anguniarlugu inuussutissarsiutinut agguagassat 20 mio. kr.-t aningaasaliissutigineqarsimapput.

Illassutitut aningaasaliissutit siuliani taaneqartut saniatigut Naalakkersuisut inuiaqatigiinnut pingaaruteqarluinnartumik ilassutitut aningaasaliissutit missingersuutitigut sunniuteqanngitsut 2019-imi akuersissutigineqarnikuunerat nuannaarutigalugu oqaatigerusuppaat. Tamatumami kingunerisaanik Namminersorlutik Oqartussat SAS-ip qallunaallu naalagaaffiata Air Greenland A/S-imi piginneqatigiissutaat pisarisimavaat, taamaalillutillu Namminersorlutik Oqartussat Air Greenland A/S-imik kisimiillutik ullumikkut piginnittuulerlutik. Tamatuma saniatigut 20 mio. kr.-nik avataani angallammik misissuummik nutaamik angallatissamut Pinngortitaleriffimmut aningaasaliisoqarpoq. 20 mio. kr.-nik ilassutitut aningaasaliissuteqarnikkut aningaasanullu inatsimmi siunertamut immikkoortitsinikkut Nunatta Karsianut aningaasalersuutit tamarmiusut katillugit 220 mio. kr.-usut inissipput taamaalillunilu angallat misissuut nutaaq 2021-mi angallaffiulernerani tunniunneqassaaq.

IST-mi angusat missingersuutigineqartut 55,5 mio. kr.-nik ajorseriarnerisa kingunerisaanik 2019-imut Illassutitut Aningaasaliissutissanut Inatsisissatut Siunnersuummi IST-imi amigartoornerit 43,4 mio. kr.-nut missingersuutigineqarput ukiumilu aningaasanut inatsiseqarfiusumi 2019-imi IS-imi amigartoorutit 48,3 mio. kr.-nut missingersuutigineqarlutik.

Paatsoortoqannginnissaa pillugu erseqqissaassutigineqassaaq ukiumut aningaasanut inatsiseqarfiusumut 2019-imut tunngatillugu inaarutaasumik missingersuutit matumani pineqarmata. 2019-imut inaarutaasumik naatsorsuutit 2019-imut Nunatta Karsiata Naatsorsuutaaniissapput.

Taamatut oqaaseqarlunga Naalakkersuisut 2019-imut Ilassutitut aningaasaliissutitut inatsimmut siunnersuutaat Inatsisartunut suliassanngortippara.